

Kerdipan Ke-30

Kerdipan Ketiga Puluh Daripada Surat Ke-31 dan Buah Daripada Penjara Eskişehir Ini Mengandung Enam Noktah

[*Meyve Risalesi (The Fruits of Belief)* merupakan satu pelajaran paling utama diperoleh dari Madrasah Yusuf di Denizli, dan *Hüccetü'z-Zehrâ (The Shining Proof)* merupakan pelajaran paling bernilai dari Madrasah Yusuf di Afyon. Sepertimana keduanya, begitulah Kerdipan ke-30 ini yang menjelaskan enam noktah mengenai enam Nama Ilahi yang membawa Enam Nama Teragung yang merupakan pelajaran paling berkesan dari Madrasah Yusuf di Eskişehir. Tidak semua orang akan dapat memahami dan menghargai secara mendalam dan meluas mengenai Nama *al-Hayyu* (Yang Maha Hidup) dan *al-Qayyum* (Yang Maha Berdiri Sendiri) dari banyak-banyak nama Yang Teragung itu, tetapi mereka akan memperoleh sebahagian daripada ilmu tersebut walau tidak kesemuanya.]

NOKTAH PERTAMA

Nama Allah *Al-Quddus* (Yang Maha Suci)

[Noktah ini menunjukkan satu aspek maksud nama Allah *Al-Quddus* (Yang Maha Suci). Sesuai sekali ia membentuk lampiran kepada Lampiran bagi Kalimat Ke-30.]

بِسْمِ اللَّهِ الرَّحْمَنِ الرَّحِيمِ

وَالْأَرْضَ فَرَشْنَاهَا فَنِعْمَ الْمَاهِدُونَ

"Dan bumi pula Kami hamparkan (untuk kemudahan kamu mendiaminya); maka Kamilah sebaik-baik yang menghamparkannya."

(Surah al-Dharyat: [51:48])

Salah satu jelmaan daripada Nama Ilahi ialah *al-Quddus* (Yang Maha Suci). Nama ini menjelaskan salah satu maksud daripada ayat di atas iaitu Nama Tuhan Yang Maha Agung atau salah satu daripada enam cahaya-Nya yang terkandung di dalam nama-Nya yang Teragung *al-Ismul A'zhom*. Ia menjadi jelas pada bulan Sya'ban ketika dirikuku berada di Penjara Eskişehir. Penerangan tersebut sangat jelas dan terang tentang kewujudan dan keesaan Ilahi. Aku melihatnya seperti berikut:

Alam semesta ini adalah sebuah kilang besar yang sentiasa beroperasi dan dunia adalah asrama dan rumah tamu yang sentiasa dihuni dan dikotori dengan segala macam kotoran, saki-baki bahan gunaan dan bahan buangan yang berkumpul di pelbagai ceruk dan sudut. Tempat-tempat ini tidak boleh didiami melainkan jika diurus, dicuci dan disapu. Jika tidak manusia akan ditenggelami oleh sampah-sarap itu. Kilang alam semesta dan rumah tamu bumi ini sebaliknya pula adalah suci sepenuhnya, bersih tanpa sebarang kotoran; tiada kotoran, tiada bekas dan tanda kotoran dan sentiasa segar. Tiada sebarang saki-baki yang tidak diperlukan; tiada yang tidak bermanfaat; tiada

sebutir kotoran pun yang boleh dijumpai secara tidak sengaja. Jika ada pun, ia akan cepat-cepat dimasukkan ke dalam mesin transformasi dan dibersihkan.

Ini bermakna, Pengurus yang mengurus kilang ini telah mengurusnya dengan sangat baik. Pemiliknya adalah orang yang menyapu, membersihkan dan menyusun kilang yang besar dan istana yang luas itu seolah-olah keduanya adalah bilik-bilik yang kecil. Mengambil kira saiz dan keluasan kilang tersebut, tiada saki baki kotoran dan serpihan sampah yang ditinggalkan daripada kotoran-kotoran tersebut. Ternyata, kebersihan dan kerapiannya amat menakjubkan.

Jika seseorang tidak membersihkan dirinya dan mengemas bilik kecilnya selama sebulan, dia dan biliknya akan menjadi sangat kotor dan berdaki. Ini bermaksud, kebersihan, kesucian, dan cahaya kilauan di dalam istana dunia ini muncul dari proses pembersihan, menyapu dan menjaganya yang berterusan, bijak dan teliti. Jika tidak kerana proses pembersihan, menyapu dan menjaga dengan teliti ini, pasti dalam tempoh satu tahun, kesemua seratus ribu spesies haiwan yang terdapat di atas permukaan bumi ini akan menjadi lemas di permukaannya.

Juga, serpihan-serpihan daripada planet-planet di angkasa dan di langit yang menjelmakan kehidupan, kematian serta satelit-satelit dan bintang-bintang akan berlaga dan memecahkan kepala-kepala kita dan haiwan-haiwan malah dunia dan alam semesta ini. Serpihan-serpihan itu akan berguguran jatuh ke atas kepala kita seperti hujan batu sebesar gunung menyebabkan kita bertempiaran lari daripada tanah air kita di dunia ini. Walau bagaimanapun, masa telah berlalu sekian lama. Sebagai amaran, beberapa meteorit telah terjatuh hasil daripada kemusnahan dan pembinaan semula alam semesta yang berlaku di dunia yang sempurna ini. Namun tidak pernah ada kepala seorang manusia pun yang dipecahkan.

Tambahan pula, bangkai-bangkai daripada seratus ribu spesis binatang dan serpihan sampah sarap daripada dua ratus ribu spesis tumbuhan di atas muka bumi ini yang bergelut antara hidup dan mati setiap tahun, akan menyebabkan kekotoran yang amat dahsyat di darat dan di laut. Keadaan ini akan menyebabkan sesiapa sahaja yang mempunyai perasaan, berpaling daripada rasa cinta dan bahagia terhadap bumi ini, kepada membenci dan berasa jijik terhadap keburukannya lalu melarikan diri dari kematian dan ketiadaan.

Sepertimana mudahnya seekor burung membersihkan sayapnya dan seorang penulis membersihkan lembaran yang ditulisnya, begitulah bumi membersihkan sayap-sayap kapal terbangnya serta burung-burungnya daripada planet-planet yang berterbangan di angkasa serta lembaran-lembaran kitab alam semesta dibersihkan dan diperindahkan. Keadaan ini berlaku sehinggakan orang yang tidak dapat melihat keindahan alam akhirat yang abadi dengan pandangan iman akan menjadi asyik dengan keindahan dan kebersihan dunia ini sehingga mereka menyembahnya.

Dalam kata lain, istana bumi ini dan kilang alam semestanya telah mempamerkan satu jelmaan manifestasi yang teragung daripada nama Allah al-Quddus. Haiwan-haiwan pembersih karnivor daripada lautan dan helang-helang di darat menurut perintah pembersihan yang mulia ini. Bukan itu sahaja, malah pegawai-pegawai pembersihan awamnya seperti cacing dan semut mengumpulkan berbagai jenis bangkai. Sebagaimana arahan pembersihan yang mulia ini dituruti oleh sel-sel darah merah dan putih yang mengalir di dalam tubuh kita untuk melakukan pembersihan di dalam sel-sel badan, begitulah proses pernafasan yang berlaku untuk mensuci dan membersihkan darah.

Seperti mana kelopak-kelopak mata patuh kepada arahan untuk membersihkan mata dan lalat-lalat membersihkan sayapnya begitulah langit yang luas dan awan juga taat kepada perintah ini.

Angin yang bertiup bersama cebisan-cebisan sampah dan debu jatuh ke atas permukaan bumi lalu membersihkannya. Span-span serapan dalam bentuk awan-awan yang mengandung air akan menyirami taman-taman dan memendapkan debu dan tanah. Selanjutnya, agar angkasa raya ini tidak dicemari, angin dengan cepat mengumpulkan kemudian mengeluarkan sampah-sarap bumi, lalu menyembunyikannya dengan susunan yang sangat sempurna. Angin mempamerkan wajah dan mata langit yang indah berkilau dan bergemerlapan seperti disapu dan digilap.

Sebagaimana semua bintang, unsur, galian dan tumbuhan mematuhi arahan pembersihan ini begitulah dengan semua atom yang turut mematuhi. Mereka memberi perhatian kepada kebersihan dalam bentuk pergolakan perubahan dan transformasi yang menakjubkan. Atom-atom tidak berhimpun atau menghalang sesuatu di mana-mana tempat tanpa sebab. Jika tercemar, atom-atom itu segera dibersihkan. Mereka diarah oleh tangan hikmah untuk memperoleh keadaan yang paling bersih, kemas dan bersinar dalam bentuk yang paling indah, suci dan halus.

Oleh itu, pelaksanaan pembersihan yang merupakan satu hakikat kebenaran ini, adalah jelmaan teragung daripada nama Allah al-Quddus yang memperlihatkan diri-Nya dalam lingkaran alam semesta yang terbentang luas. Sama seperti cahaya matahari, jelmaan-Nya yang bersinar terang benderang memperlihatkan kepada pandangan mata yang jauh dan fikiran yang luas tentang kewujudan dan keesaan Ilahi bersama-sama dengan nama-nama Allah (al-Asma' al-Husna) Yang Maha Indah.

Dalam banyak bahagian dalam Risālat al-Nūr, telah dijelaskan dengan bukti-bukti yang kukuh bahawa proses penyusunan yang bersistematik ini adalah antara jelmaan daripada nama al-Hakim (Yang Maha Adil) dan al-Hakim (Yang Maha Bijaksana). Perbuatan penyeimbangan dan keseimbangan pula adalah antara jelmaan daripada nama al-Adl (Yang Menyeimbangkan) dan al-Adil (Yang Maha Adil). Juga perbuatan menghias dan ihsan kebaikan pula adalah antara jelmaan daripada nama al-Jamil (Yang Maha Cantik) dan al-Karim (Yang Maha Mulia) manakala perbuatan mendidik dan memberi nikmat pula adalah antara jelmaan daripada nama al-Rabb (Yang Maha Mendidik) dan al-Rahim (Yang Maha Mengasihani). Kesemuanya adalah perbuatan dan hakikat yang menunjukkan wajib wujudnya Tuhan Yang Satu dan Yang Maha Esa. Begitu juga dengan perbuatan membersihkan dan menyucikan, maka ia adalah salah satu jelmaan daripada nama al-Quddus (Yang Maha Suci) yang menzahirkan dengan terangnya seperti cahaya matahari menampakkan kewujudan Dia Yang Tunggal dan keesaanNya sejelas cahaya di siang hari.

Sebagaimana yang dijelaskan di atas, perlakuan seperti menyusun, menetapkan, menghias dan membersihkan itu menonjolkan kewujudan Pencipta Yang Tunggal, yang bersifat Esa dengan amat jelas pada alam semesta yang amat luas ini. Begitulah keadaannya dengan kebanyakan al-Asma' al-Husna. Bahkan daripada 1001 nama-namaNya, setiap satu nama daripada al-Asma' al-Husna itu mempunyai jelmaan yang amat agung dan luas dalam alam semesta ini. Perbuatan yang terhasil daripada jelmaan tersebut menunjukkan Dzat Yang Maha Esa dengan zahir yang amat nyata dan luas sesuai dengan kebesaran-Nya.

Hakikat-hakikat yang telah terbukti kebenarannya, menyinari seluruh alam semesta membuatkan mereka tersenyum seperti hikmah kebijaksanaan sejagat yang menundukkan segala sesuatu terhadap undang-undang dan peraturan yang membuktikan keesaan-Nya. Rahmat Allah yang luas menimbulkan kegembiraan dan kebahagiaan kepada setiap sesuatu lalu menjadikannya gembira dan bersyukur. Rezeki yang menyeluruh menjadikan segala makhluk yang bernyawa dapat meneruskan kehidupan dan menikmati kelazatannya. Kehidupan dan pemberian kehidupan yang menghubungkan segala sesuatu dengan sesuatu yang lain membolehkannya mendapat manfaat daripada segalanya, seolah-olah dia adalah pemilik kepada semua benda tersebut. Kesemua itu adalah hakikat yang jelas menunjukkan keesaan Tuhan Yang Maha Bijaksana, Yang Maha Mulia, Yang

Maha Mengasihani, Yang Maha Memberi Rezeki, Yang Maha Hidup dan Yang Maha Menghidupkan, sejelas cahaya yang menunjukkan wujudnya matahari.

Ratusan kejadian Allah yang meluas, setiap satunya menjadi bukti nyata tentang keesaan Allah. Misalnya, setiap satu perkara seperti kebijaksanaan, keprihatinan, rahmat, pemuliharaan dan pemberian kehidupan merupakan hakikat-hakikat kebenaran serta bukti yang bersandar kepada Tuhan Pencipta alam. Sekiranya tidak disabitkan kepada Tuhan Yang Maha Esa, ratusan perkara mustahil dalam ratusan aspek bakal muncul.

Jika perbuatan membersihkan atau menyucikan tidak disandarkan kepada keesaanNya, semua benda-benda yang mempunyai hubungan dengan proses pembersihan itu bermula daripada atom, unsur, serangga dan planet mestilah mengetahui bagaimana untuk membersihkan alam semesta yang amat luas ini, menghias, mencantikkan dan melakukannya dengan penuh keseimbangan. Atau mestilah setiap sesuatu itu bersifat dengan sifat-sifat suci lagi mulia yang merupakan sifat tuhan yang menguasai seluruh alam ini. Atau mestilah terdapat satu majlis syura (mesyuarat) yang luas, seluas alam semesta ini bagi menyusun dan mengatur proses menghias dan membersihkan bumi ini serta mengukur setiap sesuatu yang masuk dan keluar darinya dengan penuh keseimbangan. Mesyuarat ini pula hendaklah terdiri daripada atom-atom, serangga-serangga dan bintang-bintang yang tidak terbatas bilangannya. Demikianlah bagaimana seseorang yang melalui jalan kufur sampai kepada ratusan khurafat yang hina dan falsafah yang mustahil, barulah penghiasan yang menyeluruh dan pembersihan yang sempurna dapat dizahirkan di atas muka bumi ini. Maksudnya, apabila hakikat bahawa sandaran kepada Allah SWT dinafikan atau ditiadakan, maka bukan sahaja wujud satu kemustahilan, bahkan ia membawa kepada ribuan kemustahilan.

Jika cahaya pada waktu siang dan segala sinaran yang berkelip pada benda-benda di dunia ini, tidak kita sandarkan kepada matahari dan tidak ditafsirkan sebagai pantulan-pantulan cahaya daripada matahari, maka matahari perlu wujud pada setiap kepingan kaca yang telus. Pada setiap titisan air yang bersinar dan pada setiap butiran salji yang berkerlipan sehingga matahari yang sebenar itu perlu wujud pada setiap atom udara, agar ia dapat menzahirkan cahaya yang melimpahi seluruh kewujudan ini.

Justeru, hikmah kebijaksanaan adalah cahaya. Rahmat yang luas adalah cahaya. Setiap sesuatu perhiasan, penyeimbangan, penyusunan dan pembersihan adalah cahaya yang menyeluruh, merangkumi dan meliputi segala sesuatu. Semua ini adalah sinaran daripada Matahari Yang Azali. Sekarang, lihatlah dengan cahaya iman agar kamu nampak bagaimana mereka yang kufur dan sesat jatuh ke dalam lembah yang dalam sehingga tidak memungkinkan mereka untuk keluar semula daripadanya! Lihatlah betapa bodohnya kejahilan mereka yang sesat! Maka katakanlah: "Segala puji bagi Allah atas agama Islam dan kesempurnaan iman."

Jadi, pastinya pembersihan Yang Maha Tinggi lagi menyeluruh yang menjadikan istana alam semesta ini bersih adalah satu jelmaan dan tuntutan daripada nama al-Quddus. Sebagaimana semua makhluk bertasbih dengan nama Allah al-Quddus, maka nama al-Quddus ini menuntut kebersihan daripada makhluk-makhluk tersebut.¹

Oleh kerana kesucian adalah pertalian berkaitan kebersihan maka hadis yang bermaksud "*kebersihan adalah sebahagian daripada iman*"² menganggap bahawa penyucian adalah salah satu

¹ Kita tidak boleh lupa bahawa moral yang buruk, keyakinan yang batil, dosa dan bid'ah adalah contoh-contoh kotoran-kotoran maknawi.

² Muslim, Tahara 1; Darimi, Vudu' 2; Musnad v, 342; a-Ajluni, Kashfu'l-Khafa 291.

daripada cahaya iman. Seterusnya ayat al-Quran daripada firman Allah berikut ini menunjukkan bahawa kesucian merupakan faktor untuk memperoleh kasih sayang Ilahi, bahkan ia adalah paksinya.

إِنَّ اللَّهَ يُحِبُّ التَّوَّابِينَ وَيُحِبُّ الْمُتَطَهِّرِينَ

“Sesungguhnya Allah mengasihi orang-orang yang banyak bertaubat, dan mengasihi orang-orang yang sentiasa mensucikan diri.”

(Al-Baqarah [2: 222])

سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ

*Mahasuci Engkau. Tidak ada yang kami ketahui, kecuali apa yang Engkau ajarkan pada kami.
Engkaulah Yang Maha Mengetahui dan Mahabijaksana.*
